

VEDLEGG

04/2771-218

Sveio kommune

Sakspapir

SAKSGANG			
Behandling	Møtedato	Saksnr	Saksbehandler
Kommunestyret	31.01.2005	008/05	OHD

Avgjerd av:	Arkiv: N-010	Arkivsaknr
Saksansv.: Odd Henry Dahle	Objekt:	2004000984

**NOU 2004:19 LIVSKRAFTIGE DISTRIKTER OG REGIONER -
DISTRIKTSKOMMISJONENS UTREDNING - UTTALE FRÅ SVEIO KOMMUNE.**

Rådmannen 18.01.2005:

Dokumentliste:

Nr	T	Dok.dato	Avsender/Mottakar	Tittel
1	I	14.10.2004	Det kongelige kommunal- og regionaldepartement	HØYRING - DISTRIKTSKOMMISJONENS UTREDNING.

Bakgrunn:

Distriktskommisjonen vart sett ned av Regjeringa i februar i 2003. Mandatet vart å gå igjennom alle sider ved distrikts- og regionalpolitikken, og gjera framlegg om endringar i innretting og verkemiddelbruk. Kommisjonen sitt arbeid ligg føre som NOU 2004: 19 Livskraftige distrikter og regioner, og er no til høyring i kommunar, fylkeskommuner og andre.

Saka må sjåast i samanheng med sak om "KOU 2004:1 Sterke regioner – høyringsfråsegn" med høyringsfrist 01.02.05 og til Vestlandsrådet si "Utgreiing av eit eventuelt nytt regionalt nivå på Vestlandet".

Høyringsfristar:

Utgreiinga er sendt med to ulike høyringsfristar, 14. oktober 2005 for tema som er knytt til framtidig fylkes- og kommunestruktur, oppgåvefordeling og maktfordeling/regionalisering. For andre tema i utgreiinga er høyringsfrist sett til 14. januar 2005.

Hordaland fylkeskommune meiner det er sentralt å handsama heile høyringa innan 14. januar. Dette er også i tråd med tilrådinga til KS. Etter det me kjenner til, vil også dei andre fylkeskommunane uttala seg om hele meldinga. Det kan vera aktuelt å koma med ein supplerande uttale innan fristen 14. oktober 2005, dersom den politiske prosessen lokalt eller sentralt skulle tilseia dette. Dette kan vera ein fornuftig strategi også frå kommunane i Hordaland. Då vil ein også gje føringar inn mot den regionalmeldinga som Regjeringa skal presentera våren 2005, samt kople uttalen til KS sitt arbeid med KOU 2004:1 Sterkare regioner.

Sveio kommune vel å svara NOU 2004:19, Distriktskommisjonen, samla for problemstillingar med høyringsfristane 14.01.05 og 14.10.05.

Hovudinnhald i distriktskommisjonen

Problemforståing

Distriktskommisjonen tar utgangspunkt i følgjande problemforståing:

- Sprik mellom mål og røyndom. Sentraliseringa held fram som før, og dei verkemidla som blir sett inn er ikkje tilstrekkelege til å kunne endre utviklinga. Likevel høyrer me den politiske retorikken og målsettinga om å bevare hovudtrekka i busettingsmønsteret.
- Verdiskapingspotensial som ikkje blir utløyst. I heile landet, og særleg i distrikta, er det ressursar som ikkje blir utnytta. Handlingsromma lokalt blir innsnevra i ein slik grad at lokalsamfunn ikkje lenger blir i stand til å ta ansvar for eiga utvikling.
- Mangel på heilskapsperspektiv. Ein meir sektorisert statleg politikk (t.d. gjennom ulike regioninndelingar) gjer det vanskelegare å tilpasse regional- og distriktpolitikken til føresetnader og utfordringar i det einskilde lokalsamfunn og den enkelte region.

Visjon

Utvalet gjer framlegg om følgjande visjon:

"Videreutvikle **attraktive og livskraftige lokalsamfunn** gjennom et **aktivt og konkurransedyktig næringsliv** og **likeverdige tjenestetilbud** i hele landet, med sikte på å opprettholde **hovudtrekkene i bosettingsmønsteret**"

Hovudmålet for distriktskommisjonen er å skapa vekst og utvikling i alle delar av landet, for på denne måten å auke den nasjonale verdiskapinga. For å sikra dette, må politikken ha eit regionalt perspektiv, som går ut over den einskilde kommune, og vera tilpassa føresetnader og behov i den einskilde region.

Heile kommisjonen tilrår at ein hovudstrategi bør vere å desentralisere makt til underliggjande forvaltingsnivå. Vidare at staten framleis skal ha det overordna ansvaret for sektorpolitikken og å fastsetja distrikts- og regionalpolitiske målsettingar knytt til dei ulike politikkområda.

Fleirtalet meiner det er behov for desentralisering av makt til både kommune- og regionnivå. Mellom anna ønskjer dei eit langt sterkare regionalt nivå enn dagens fylkeskommunar, og meiner at dette må skje gjennom desentralisering av oppgåver og makt frå staten. Fleirtalet meiner regionane bør ha eit heilskapleg ansvar for regional utvikling og ta over viktige oppgåver innan infrastruktur og samferdsel, utdanning og forskning, næringsutvikling, kultur og idrett, kommuneoverskridande areal- og ressursforvaltning, visse oppgåver innan helse samt verkemiddel innan viktige distriktsnæringar.

Mindretalet ønskjer ei avvikling av fylkeskommunen og etablering av ein ny forvaltningsstruktur med to folkevalde nivå. Først og fremst ser ein føre seg ei samanslåing av kommunar, for mellom anna å skape einskaplege forvaltningsstrukturar rundt dei naturlige arbeids-, bu og serviceregionane som har vokse fram over tid. I tillegg meiner mindretalet at ein del oppgåver må løysast på eit større regionalt nivå. Dette kan dels gjerast gjennom fleksible samarbeidsmodellar mellom kommunane, og dels ved å vidareutvikle fylkesmannsambetet eller bli erstatta med ein ny regional struktur, t.d. leia av politisk oppnemnde representantar for den sittande regjeringa ("guvernørar").

Utgreiinga inneheld også ei rekkje konkrete framlegg for å auka verdiskaping i heile landet.

Premissar for måldiskusjon

- Distriktskommisjonen har lagt følgjande premissar til grunn for sin måldiskusjon:
- I tråd med *nærleiksprinsippet* bør avgjerder blir gjort på det lågaste effektive forvaltingsnivået. Avgjerder som krev skjønn eller inneber prioriteringar mellom ulike omsyn og interesser bør gjerast av direkte folkevalte organ.
- Målsetjingane i distrikts- og regionalpolitikken skal vere *ærlege*. Dei skal skildre ei ønska utvikling, vere realistiske i forhold til kva som er mogleg å oppnå og dei skal vere balanserte i høve til andre samfunnsmessige målsettingar.
- Norsk næringsliv må vere i stand til å møte internasjonal konkurranse både ute og heime.
- Målsetjingane skal vere *forutsigbare* og *robuste*. Det vil seie at dei bør kunne stå seg over tid, både i høve til utviklinga i nasjonale og internasjonale rådevilkår, og i høve til skiftande konstallasjonar i Stortinget.
- Einskildmenneske og næringsaktørar gjer sine *eigne og frie val*, innanfor dei rådevilkåra samfunnet og fellesskapet sett.
- Busetnadsmonsteret vil i hovudsak liggje fast i lang tid framover.
- Samfunnets *evne til å endre seg og møte nye utfordringar* vil vere grunnleggjande for å kunne lukkast i distrikts- og regionalpolitikken.
- Våre rike *naturressursar* skal fortsett nyttast til å byggje landet.

Kommisjonen skil mellom regional- og distriktpolitikk:

Regionalpolitikken skal fokusere på å:

- gjere verdiskapinga i landet størst mogleg
- å styrkje samspelet mellom sentrum og distrikt
- territoriell samordning av m.a. statleg sektorpolitikk

Distriktpolitikken skal kompensere for geografiske veksthindringar og stimulere til lokal tiltaksløst.

I følgje distriktskommisjonen er det eit stort handlingsrom for å endre kurs. I den breie distriktpolitikken står vi stort sett fritt, mens i den smale og næringsretta politikken har vi eit stort unytta handlingsrom

Kommunane

Når det gjeld kommunane, meiner kommisjonen at det fortsett bør vere generalistkommunar. Dei rår også til at det bør overførast ytterligare oppgåver og ansvar til det *kommunale nivået*. Dette for å gje kommunane større mogelegheit til å ta ansvar for eigne ressursar og eiga utvikling. Spesielt vil det være aktuelt å styrkje kommunane sitt ansvar for arealforvaltning, næringsutvikling og stadutvikling.

Distriktskommisjonen viser til at særleg i dei tett folketette områda er det mange kommunegrenser som splittar tett kopla arbeids-, bu og serviceregionar (ABS-område). Dette er områdar som er sterkt avhengig av kvarandre og kor det er behov for planlegging på tvers av kommunegrenser. Det er desse områda som bør prioriterast i ein gjennomgang av kommunestrukturen. Fleirtalet i kommisjonen meiner mange distriktskommunar har så stort areal og så spreitt busetting, og at ei samanslåing mellom slike kommunar og vil gi lita gevinst.

Mindretelet som ønskjer ein to-nivåmodell, vil ha ei utvikling av større kommunar som omfattar felles arbeids-, bu- og serviceregionar.

SAMSPEL MELLOM NIVÅA.

Fleirtalet i kommisjonen som ønskjer ein tre-nivåmodell rår til at det vert utvikla nye samarbeidsformar mellom statleg og regionalt nivå. Staten har det overordna ansvaret, samstundes som det regionale nivået får meir forutsigbare rårer og større fridom. Heilskaplege og fokuserte regionale plandokument må bli viktige premisser i den statlige planlegginga. Kommisjonen meiner det må vere dialog, forhandlingar og forpliktande avtaler mellom statlig og regionalt nivå.

ATTRAKTIVE OG LIVSKRAFTIGE SAMFUNN

Heile kommisjonen er samde om at det må vere samsvar mellom kommunale oppgåver og økonomiske ressursar. Rammefinansiering bør vere hovudprinsippet i det kommunale inntektssystemet. Innan dei økonomiske rårer bør lokalpolitikarane få avgjere korleis velferdstilbodet skal utformast.

Eit fleirtal meiner at kommunesektoren bør ha forhandlingsrett med staten om utvikling og iverksetjing av nye oppgåver som kommunane blir pålagde. Eit mindretal meiner kommunane bør regulere sine egne inntekter gjennom innføring av fri beskatningsrett.

Eit fleirtal meiner inntektssystemet bør kompensere for at distriktskommunane har andre føresetnader enn større og meir sentrale kommunar. Eit mindretal meiner at dei viktigaste primæroppgåvene bør finansierast gjennom stykkpris.

GEOGRAFISK DIFFERENSIERING AV VERKEMIDDEL

Innan distriktpolitikken bør det bli gitt prioritet til tiltak for å utvikle nye og sikre levedyktige arbeidsplassar i distrikta, tiltak retta mot fornying og omstilling og tiltak som kan styrkje samspelet mellom by og land innan den einskilde region.

Eit fleirtal tilrår at distriktpolitikken vert tilført meir midlar, og at husbanken blir styrkt som ein ålmenn bustadbank som blir gitt lånerårer som står i forhold til det etterspurte behov. Husbanken bør ha betre moglegheit for å finansiere nybygging i område der annenhandsverdien av bustader er låg. Eit anna fleirtal vil oppretthalde og auke pendlarfrådraget.

Eit fleirtal tilrår at den differensierte arbeidsgjevaravgifta bør i så stor grad som mogleg bli oppretthaldd og gjeninnført dersom regelverket i EU tillet dette. Eit mindretal vil ikkje gjeninnføre ordninga.

Heile kommisjonen meiner det distriktpolitiske verkemiddelområdet bør fortsett definerast slik at ein kan ha ulik verkemiddelbruk i områder med ulik distriktsutfordringar.

Eit fleirtal meiner at for å unngå at dei mest sårbare småsamfunna forvitrar, er det viktig å oppretthalde grunnleggjande tilgang på tenester. M.a. bør støtta til nærbutikkar vidareførast, og førstelinetenesta for statlege etatar bør leggjast til rette i eit samarbeid med kommunen.

Eit fleirtal meiner tiltakssona for Nord-Troms og Finnmark bør oppretthaldast så lenge dei distriktsmessige utfordringane i dette området er som i dag. Blir situasjonen endra, bør situasjonen bli vurdert på ny. Same type sterke verkemiddel bør kunna nyttast i andre område av landet. Eit mindretal meiner det bør opprettast eit nasjonalt senter for småsamfunn.

Tilrådingar når det gjeld styringsstruktur.

Heile kommisjonen tilrår at ein hovudstrategi bør vera å desentralisera makt til underliggjande forvaltingsnivå. Vidare at staten framleis skal ha det overordna ansvaret for sektorpolitikken og å fastsetja distrikts- og regionalpolitiske målsettingar knytt til dei ulike politikkområda. Den statlege politikken bør ta utgangspunkt i at dei ulike regionane har ulike føresetnader for vekst. Fleirtalet i kommisjonen (12 personar) meiner det må leggjast opp til ei styrkt territoriell samordning av statleg sektorpolitikk på regionalt nivå.

Trenivåmodell: Fleirtalet (12 medlem) meiner det er behov for desentralisering av makt til både kommune- og regionnivå. Mellom anna ønskjer dei eit langt sterkare regionalt nivå enn dagens fylkeskommunar, og meiner at dette må skje gjennom desentralisering av oppgåver og makt frå staten. Sterke og sjølvstendige regionar må ha makt til å foreta ei reell territoriell samordning av politikken på dei områda som er viktige for regional utvikling. Meir ansvar og mynde til dette nivået betyr ikkje utan vidare at det regionale forvaltningsnivået må utføra alle oppgåvene sjølv. Det viktige er at regionane får bestillaransvaret.

Eit medlem i fleirtalet argumenterer for ein modell med rundt 80 regionkommunar, i hovudsak basert på dagens kjente arbeids- bu og serviceregionar. Det er ulike synspunkt blant fleirtalet om kor mange regionar Noreg bør ha i framtida.

Tonivåmodellen. Mindretalet (3 representantar) ønskjer ei avvikling av fylkeskommunen og etablering av ein ny forvaltningsstruktur med to folkevalte nivå. Først og fremst ser ein for seg ei samanslåing av kommunar, for mellom anna å skapa einskaplege forvaltningsstrukturar rundt dei naturlige arbeids-, bu og serviceregionar som har vakse fram over tid. I tillegg må ein del oppgåver løysast på eit større regionalt nivå. Dette kan dels gjerast gjennom fleksible samarbeidsmodellar mellom kommunane, og dels ved å vidareutvikle fylkesmannsembetet eller bli erstatta med ein ny regional struktur, t.d. leiast av politisk oppnemnde representantar for den sittande regjeringa ("guvernørar").

Vurdering:

EIT STERKT FOLKEVALD REGIONALT NIVÅ

Etter rådmannen si vurdering gir distriktskommisjonen ei god skildring av dei viktigaste utfordringane innan distrikts- og regionalpolitikken. Det er grunn til å leggja merke til at sjølv om det er ulike syn i kommisjonen når det gjeld dei ulike vegvala, er det grunn til å presisera at dei er samde om skildringa av utfordringane, og er samde om overordna strategiar. Alle er også samde om at det er behov for ei sterkare koordinering på regionalt nivå.

Distriktskommisjonen kjem med ei heilskapleg tilråding, der dei ulike framlegga og tilrådingane inngår i ein heilskap. Rådmannen vonar at einskildframlegg ikkje blir trekte ut og handsama separat utan nokon heilskap.

Distriktskommisjonen skildrar ein fragmentert statleg politikk, der kvar sektor organiserer seg ut i frå kva som er optimalt i den einskilde sektor. Dette fører til mangel på heilskaplege løysingar. Me har mange døme på dette, t.d. at ulik geografiske inndelinga av statlege etatar. Dette vanskeleggjar ei samordna styring. Og me ser at sektorar som t.d. helseføretak omorganiserer utan at dei tek omsyn til at dette påfører kommunar og andre etatar meir kostnader. Styring på regionalt nivå, med dei oppgåver kommisjonen meiner bør liggja på dette nivået, handlar om å utvikle samfunnet i heile sin bredde. Det er ei anna strategi enn å administrere ulike samfunnssektorar. Me meiner difor at ein heilskapleg og samordna politisk innsats stiller krav til regionalt folkevald leiarskap.

- a) *Rådmannen vil på dette grunnlag gje si støtte til kommisjonen si fleirtalstilråding om eit folkevald nivå mellom kommunar og stat som har ansvar for regional utvikling innan sine geografiske grenser på nærmare fastsette område.*

Region.

Skal det opprettast sterke regionar, må dei ta det fulle ansvar for å ta avgjerder. Dette kan bidra til å gje regionane ein sterkare legitimitet i folket til også å ta vanskelege avgjerder, og til å gjennomføra vedtaka på ei effektiv måte. På den måten kan ein unngå at saker må gå igjennom fleire nivå før avgjerder vert teke.

Val av styrings- og finansieringsmodellen må byggja på at regionane skal vere eit sterk og sjølvstendig forvaltningsnivå, med klårt definerte oppgåver, ansvar, myndigheit og finansiering. Dette skal gi regional meirverdi til den nasjonale politikken ved å ivareta nasjonale interesser i politikktutforming og gjennomføring. Slike sterke regionar vil gje det beste grunnlaget for eit omfattande og forpliktande samarbeid med stat, kommune, næringsliv og organisasjonar om regionale utviklingsspørsmål. Ei hovudutfordring vil vere å utforma eit styringssystem slik at regionane vert sikra fridom og handlingsrom innanfor rāmene av ei overordna nasjonal styring. Dette må utgreiast vidare, men me trur det er naturleg at regionane i hovudsak blir råmefinansiert. Regional skatterett bør greiast ut som del av styringsretten over lokale ressursar. Det bør også vurderast om både det kommunale og regionale nivået bør bli grunnlovsfesta. Dette vil kunne gje større moglegheit for å sikre at det såkalla subsidiaritetsprinsippet (at avgjerder skal bli teke på lågast effektive nivå) vert fylgt.

B)Rådmannen meiner at når regionane skal ta over ansvar for breie samfunnsoppgåver, krev dette større regionar enn dagens fylkeskommunar. Me finn det naturleg at det vert arbeid vidare med å etablere ein region på Vestlandet med heile eller delar fylka som inngår i Vestlandsrådet. Det er viktig at arbeidsmarknadsregionar ikkje vært delte mellom regionane.

Sveio kommune meiner at større regionar vil ha større gjennomslagskraft på nasjonalt og internasjonalt nivå. Regionane kan naturleg då også ta ansvar for internasjonalt samarbeid med andre regionar. Landsdelane har også behov for eit sterkt nasjonalt nivå som kan tale landsdelen si sak. Dette vil motverka ei stadig sterkare sentralisering til Oslo-området.

Oppgåver for sterke regionar

Rådmannen gir ei klår prinsipiell støtte til tilrådinga til fleirtalet i distriktskommisjonen om kva for oppgåver det regionale nivået bør ha ansvar for. Den vidare prosessen bør definera oppgåvene ytterlegare.

Innan helsevesenet er me og samde i at det sentrale i første omgang er at det regionale folkevalde nivået har påverknad på strategiske vegval til helseføretaka. Eit skritt kan vere at lokale og regionale folkevalde blir representerte i styra for føretaka

I dag har fylkesmannen og fylkeskommunen delvis overlappende kompetanse. Samordning av oppgåvene mellom fylkesmann og fylkeskommunen vil kunna gje eit meir kvalifisert administrativt apparat og bidra til å effektivisere forvaltninga. Det vil då vere naturleg at fylkesmannen sine oppgåver blir avgrensa til tilsyn, klagehandsaming og kontroll, samt samfunnsberedskap. Det er viktig med folkevalgt styring i dei organ som forvaltar tenester til innbyggjarane. Fylkesmannsembetet bør difor ikkje ha forvaltningsoppgåver, men berre tilsynsoppgåver.

Me ser i dag ei detaljert statleg styring innan ei rekkje samfunnssektorar, og svak kommunal og fylkeskommunal økonomi. For fylkeskommunen – og dei fleste kommunane er det også avgjerande å få større råderett innan dei ansvarsområda ein har i dag. Det viktigaste for ein region vil truleg vera å ha handlingsrom og å få disponera frie midlar til regional utvikling.

Ved fastsetjing av dei økonomiske rāmene for dei nye regionane er det viktig at ein stor del av verdiskapinga vert verande i regionen. Ved statlege overføringar, må prinsippet vera at pengane følgjer oppgåvene.

Det vil vera viktig at staten si regionale organisering må tilpassast regionane si organisering.

- c) *Skal det vera eit meningsfullt folkevalt regionalt styringsnivå, må dei statlege oppgåver som gir til landsdelen påverknad over eigen utvikling overførast til det regionale styringsnivået.*
- d) *Det er viktig å skape nærleik mellom innbyggjarane og dei folkevalgte region-organa, og dette kan skapast med at desse blir vald gjennom representasjon frå kommunane. Det vil også gi mindre moglegheit for stort byråkrati.*

Oppgåver for det kommunale nivået

Det er viktig at kommunane får auka handlingsrom og økonomi slik at dei kan drive meir aktiv samfunnsplanlegging og samfunnsutvikling .

Det må vere eit godt samspel mellom kommunane og regionen i regionalt utviklingsarbeid. Kommunane må ha stor påverknad på utvikling av politiske strategiar og verkemiddelbruk på regionalt nivå. Det er viktig for å få til gode, regionalt tilpassa samhandlingsprosessar mellom kommune- og regionnivå.

- e) *Rådmannen meiner at alle oppgåver som kan leggjast til det kommunale nivået skal leggjast til kommunane i tråd med nærleiksprinsippet. Kommunane må setjast i økonomiske stand til å utføra oppgåvene sine.*

DEI STORE BYANE

- f) *Rådmannen meiner dei store byane er viktige som økonomiske og politiske motorar sine landsdelsregionar, men har også viktige nasjonale funksjonar. Regionane har særleg eit ansvar i høve til å leggje strategiar og ha verkemiddel for å nytte "motorkrafta" frå byane.*

Grunnrente for havbruk

- g) *Rådmannen er samd med framlegget om at kommunane bør få "grunnrente" for bruk av sjøareal til havbruksnæringa. Areal er ei avgrensande faktor for utvikling av næringa, og inntekter vil kunne gje kommunane insentiv til å leggje ut areal til næringa.*

Distriktsverkemiddel.

- h) *Rådmannen meiner det er sentralt å leggje til rette for innovasjon og nyskaping i ei framtidig næringspolitikk, men verkemiddelbruken må byggje på dei lokale føresetnadene for regionen. Kommunen tilrår å oppretthalde og auke pendlarfrådraget som viktig verkemiddel for busetnad. Rådmannen støttar distriktskommisjonen sine tilrådingar når det gjeld innretting av distriktspolitikken og at det er behov for å styrkje dette feltet. Det er også behov for å kunne bruke verkemidla meir fleksibelt, som å kunne bruke regionale utviklingsmidlar til*

tilretteleggjande tiltak som kjem heile regionen til gode. Dette er t.d. viktig i høve til ei vidare utvikling av marin sektor.

Rådmannen meiner det bør utviklast og takast i bruk modellar som avdekkar regionalt og lokalt verdiskapingspotensiale innanfor ulike bransjar.

Samferdsel.

- i) *Rådmannen meiner vidare at i framtidige store regionar vil det vere sentralt å betre dei interne kommunikasjonane i regionen for med dette å kunne knyte saman arbeids- og bustadregionane. Auka satsing på infrastruktur er avgjerande for velfungerande regionar og distrikt.*

RÅDMANNEN SITT FRAMLEGG TIL VEDTAK:

1. Sveio kommune sluttar seg til Distriktskommisjonen si fleirtalstilråding om at det er behov for eit nytt folkevald regionalt nivå med større regionar til erstatning for dagens fylkeskommunar.
2. Sveio kommune går inn for ein Vestlandsregion, og meiner vidare at uansett kva storleik regionane får, er det viktig at felles bu-, arbeids- og serviceregionar er samla, og av den grunn må Nord-Rogaland og Sunnhordland vere i same region
3. Sveio kommune meiner at val til dei folkevalgte regionale organa skal skje gjennom representasjon frå kommunane.
4. Sveio kommune støttar Distriktskommisjonen si tilråding om omfattande desentralisering og samordning av verkemiddel i distrikts- og regionalpolitikken til eit regionalt folkevald nivå. Sterke og sjølvstendige regionar må ha mynde til å føreta ei reell samordning av politikken på område som er viktige for regional utvikling. Dette vil bidra til å skapa vekst og utvikling og til å utløysa meir av verdiskapingspotensialet i alle delar av landet
5. Sveio kommune sluttar seg i hovudsak til Distriktskommisjonen sitt framlegg om kva for oppgåver som bør leggjast til det nye folkevalde regionale nivået og forventar ei vidare drøfting om overføring av oppgåver for å styrkja det kommunale nivået.
6. Sveio kommune meiner at det er viktig at spørsmålet om utforming av det framtidige folkevalde regionale nivået blir avklart snarast råd, og rår til at ein ikkje avventar den planlagde evalueringa av fylkeskommunen i 2007.
7. Sveio kommune sluttar seg elles i all hovudsak til fleirtalstilrådingane frå Distriktskommisjonen med dei presiserande synspunkta som følgjer av saksutgreiinga punkta a) – i).

31.01.2005 KOMMUNESTYRET

Ordføraren opna saka med å rå til at sakene 008/01 og 009/01 vart sett i samheng under drøftingane, men at det er sak 008/01 som i utgangspunktet er opna først.

Framlegg frå Mathias Vikse/SP:

Tillegg til ny setning i pkt. 5:

Fylkesmannen sine oppgåver blir avgrensa til tilsyn, klagehandsaming og kontroll samt samfunnsberedskap.

Framlegg frå Kristin Hassel/H:

Revidert pkt. 3:

Sveio kommune meiner at val til dei folkevalde regionale organa skal skje gjennom direkte valde representantar frå kvar kommune.

Votering:

Framlegget frå Mathias Vikse – tillegg til pkt. 5 – samrøystes vedteke.

Framlegg frå Kristin Hassel til endra pkt. 3 vart vedteke med 21 for mot 4 røyster.

Mindretalet: Dagfinn Fagerland Bjørge/SP
Kjell M. Sandaker/SP
Ragnhild E. Lysen/AP
Solfrid Aasen/UAVH.

Votering:

Rådmannen si tilråding med vedtekne endringar vart vedteke med 23 mot 2 røyster.

Mindretalet: Solfrid Aasen/UAVH.
Hildur Larsen/KYSTP.

KOM-008/05 UTTALE FRÅ SVEIO KOMMUNE:

1. Sveio kommune sluttar seg til Distriktskommissjonen si fleirtalstilråding om at det er behov for eit nytt folkevald regionalt nivå med større regionar til erstatning for dagens fylkeskommunar.
2. Sveio kommune går inn for ein Vestlandsregion, og meiner vidare at uansett kva storleik regionane får, er det viktig at felles bu-, arbeids- og serviceregionar er samla, og av den grunn må Nord-Rogaland og Sunnhordland vere i same region
3. Sveio kommune meiner at val til dei folkevalde regionale organa skal skje gjennom direkte valde representantar frå kvar kommune.
4. Sveio kommune støttar Distriktskommissjonen si tilråding om omfattande

desentralisering og samordning av verkemiddel i distrikts- og regionalpolitikken til eit regionalt folkevald nivå.

Sterke og sjølvstendige regionar må ha mynde til å føreta ei reell samordning av politikken på område som er viktige for regional utvikling.

Dette vil bidra til å skapa vekst og utvikling og til å utløysa meir av verdiskapingspotensialet i alle delar av landet.

5. Sveio kommune sluttar seg i hovudsak til Distriktskommisjonen sitt framlegg om kva for oppgåver som bør leggjast til det nye folkevalde regionale nivået og forventar ei vidare drøfting om overføring av oppgåver for å styrkja det kommunale nivået. Fylkesmannen sine oppgåver blir avgrensa til tilsyn, klagehandsaming og kontroll samt samfunnsberedskap.
6. Sveio kommune meiner at det er viktig at spørsmålet om utforming av det framtidige folkevalde regionale nivået blir avklart snarast råd, og rår til at ein ikkje avventar den planlagde evalueringa av fylkeskommunen i 2007.
7. Sveio kommune sluttar seg elles i all hovudsak til fleirtalstilrådingane frå Distriktskommisjonen med dei presiserande synspunkta som følgjer av saksutgreiinga punkta a) – i).

Sveio Kommune
Føremannskapet
Rett utskrift
Marie Swarven